

JUECES

Introducción

Moisés michú, Josué michú wa'até, taka'añáaka Israel lakénami (israelítana) i'imaká ejomi, unká nawakára'ajeri i'imalá piño. Raú apú, apú eyá keja puráka'aloji lamá'atajeño lamá'atajikano najló puráka'aloji. Apú, eyá ke unká nema'aké Tupana ja'apiyá palá, pachá riyurike napinana chá'atajika neká. Kewaka napajno'otájika ee piño napéchuwa Tupana ejo, ramajo nachaje. Nayukuna nakiyá marí

1 ¹Josué michú taka'añáaka israelítana i'imaká ejomi, napura'ó Tupana wa'até, nawe'epíkaloje raú mékajenaka nanakiyana riwata i'ijnaká cananéona wa'até nókajo. ²Raú Tupana kemari najló Judá lakénami nakú, nayuríkaloje neká i'ijnaká paineko najwa'até nókajo, najña'akáloje nate'ere mi najluwa penaje. ³Raú nemá neká'ana, Simeón lakénamijlo, na'akáloje nañathé nókakajo aú. Nemá najló: “Eko a'á wañathé nácho'otakana aú nate'eré, Tupana arukákare wajló i'imaká nakiyá. Rejomi wa'ajé kaja iñathé ajopana jácho'otakana aú, ñaké kaja nate'ere mi yuríkoloje ijlo penaje”.

⁴Rejéchami nawakako pajluwa chojé, ne'ejnakáloje najwa'até nókajo penaje. Nephaka nanaku najwa'até nókajo ejéchami, Tupana a'aká nañathé nachá'atakaloje rewá i'imakaño: cananéona, ferezéona, kajena. Pajimila Bézec e nenota diez mil nanakiyana.

⁸Judá penájeminaja nókako piño Jerusalén eyájena wa'até. Piyuke nakapichátaka ina'ukena rewá i'imakaño. Nakapichátaka neká ejomi, nakára'ata riká pajimila. ⁹Rejomi nenoko piño ajopana cananéona, yenuri Négueb e'iyowá i'imakaño wa'até. Naké kaja nakapichátaka ajopana, kawakajo i'imakaño piyukeja. ¹⁰Nenoko kaja ajopana cananéona, pajimila Hebrón ewá i'imakaño wa'até. Piyukeja nakapichátaka neká, nate'ere mi yuríkoloje najló penaje.

2 ¹Tupana wa'atéjeri, je'echú chiyaje, i'ijnari pajimila Guilgal eyá, ají ke apú pajimila Boquim ejo. Re rimá israelítanjlo Tupana nakú: ²“Kaja rimá inaku i'imaká: 'T'imajika te'erí, numakare ijlo i'imaká nakú wakajé, unká nuwátala ipura'akó nakaje la'akaná pajwa'atéchaka nakú rewá i'imakaño wa'até, riyuríkoloje ñaké penaje'. Numá kaja i'imaká, ikapichátakaloje naliyá pukunaji nala'akare nachi'inárikanjlo penaje. E'iyonaja unká jema'alá no'opiyá. ¡Amá chuwa mékeka ila'aká apo'ojó! ³Ñakele numá ijlo me'etení: unká nócho'otalaje ijlo keleruna ina'ukena iléreya. Kamejérina kapichako napatajona chojé, ke kaja neká, nachi'inárikana wa'até, apichátajika ipechu, jema'aká piyá no'opiyá”, ke Tupana wa'atéjeri, je'echú chiyaje, kemaká najló.

⁴Ilé ke nema'aká rimaká najló aú kajrú neyaka. ⁵Ñakele na'á riká pukunaji íí Boquim ke (Iyakaje pukuna, ke kemakánaka ri'imaká). Rejomi nenó napirana nakiyana Tupánajlo pu'uaré nala'akare chaya.

¹⁰Kaja ewaja piyuke pheñawilana, Josué michú wa'até iphákaño michuna taka'atako. Rejomi nayanímínamí yuró. Neká unká we'epíkeño Tupana nakojé; unká kaja nawe'epike mékeka Tupana a'ajika nachi'iná michuna ñathé i'imajika.

¹¹Unká paala Tupánajlo nakaje israelítana la'ajíkare i'imajika, nala'ajíkale nakaje unká riwátalare kaje, nakeño'okale ke'iyapejena Baal jenami ja'apí iphákana. Napechu i'imaké rinaku: “Wachi'inárikana jenami riká”, ke. ¹²Kaja nayurí naliyó Tupana, nachi'iná michuna pechu i'imajíkare chojé kaphí, jácho'otari ne'emaká piyuke Egipto te'eré eyá i'imaká. Nayurí ra'apiyá jema'akana, nephákaloje rewá nawa'ó i'imakaño wa'até nachi'inárikana ja'apí. Ilé kaje pachá Tupana yúcha'aro íki'ija wani nachá. ¹³Nayurí kaja napéchuwa la'akana pu'ují Tupánajlo. Lanakiya nala'aké pu'ují napéchuwa Baal, Astarté wa'até jenámijlo. ¹⁴Ilé kaje pachá Tupana yúcha'o wani nachá, raú riyurí jata'akáchina rewá i'imakaño jata'ataka nanane naliyá piyuke. Riyurí kaja chapú nanaku péchuruna chá'ataka neká nókakajo aú. Kaja unká meke nala'aké neká. ¹⁵Israelítana i'ijnajika kewá nókajo ajopana wa'até, ajopana chá'atakeño neká, Tupana a'ajíkale nañathé nachá'atakana aú. Chapú ri'imajíkano najló. Kaja Tupana kemá júpimi ke najló i'imaká: “Unká jema'alaje no'opiyá, wakajé amaje chapú kaje yajwé”. Rimaká najló i'imaká keja ri'imaká najló, nayuríkale ra'apiyá jema'akana.

¹⁶Tupana yuriri namaka chapú kaje yajwé, e'iyonaja ra'aké nañathé. Ra'á najló nawakára'ajeño, na'akáloje nañathé,

namejñátakaloje nekó ajopana liyá penaje. ¹⁷E'iyonaja unká nema'aké nawakára'ajeño ja'apiyá, unká kaja nema'aké Tupana ja'apiyá. Kaja napechu i'imaké ajopana chi'inárikana nakú: “Wachi'inárikana kaja neká”, ke. Palá nachi'iná michuna jema'aká Tupana puráka'alo ja'apiyá i'imaká, e'iyonaja neká unká ja'apala nachuwá. ¹⁸Methú ke Tupana apiyákajika najló nawakára'ajeño; neká i'imajika ketánaja kalé Tupana mejñátajikano neká chapú nanaku péchuruna liyá. Kamu'ují Tupana we'epíjika nanaku, namájikale kajrú chapú kaje yajwé. ¹⁹E'iyonaja nawakára'ajeri tajnáñaajika neká ejomi, napa'ajiko piño pu'uaré la'ajé. Nachi'iná michuna la'ajika pu'uaré, chaje wani nala'ajíkano pu'uaré. Ajopana nakuja napechu i'imaké: “Neká wachi'inárikana”, ke. Unká nayurila naliyó pu'uaré la'akaná, kaja nawátaka ke wani nala'ajika.

²⁰Ilé kaje pachá Tupana yúcha'aro wani nachá, rimá nanaku: “Kaja mariruna ina'ukena apichata nakaje wapura'akaro nakú nachi'inami wa'até i'imaká, riyuríkoloje ñaké penaje. Numá nanaku i'imaká: Palá nula'ajika nanaku, ke, e'iyonaja unká wani nawátala no'opiyá jema'akana. ²¹Ilé ke nala'aká pachá, unká nócho'otalaje najló ina'uké lupemí yuriño maárowa, unká Josué jácho'otalarena i'imaká, ritaka'akale, unká chiyó rácho'ota ne'emaká”, ke Tupana kemaká nanaku. ²²Tupana yuriri ajopana rewá i'imakaño i'imaká najwa'até, ramákaloje mékeka israelítana la'aká. Nawata ka'ajná ra'apiyá jema'akana, nachi'iná michuna jema'ajika ra'apiyá i'imajika ke kaja; unká ka'ajná nawátala ra'apiyá jema'akana. Ramákaloje mékeka nala'aká penaje riyurí ajopana yuriko najwa'até. ²³Ñaké i'imakale, unká Tupana a'alá nañathé, nácho'otakaloje neká reyá penaje. Riyurí ne'emaká rewá najwa'até.

Gedeón yukuna marí

6 ¹Unká paala nakaje israelítana la'ajíkare i'imajika Tupánajlo. Raú riyurí madianítana la'aká ne'emaká chapú, nawátaka ke, iyamá kuwá'ata kele jarechí ketana. ²Kaja richaje, richaje ke, wani nala'ajíkano neká chapú. Israel lakénami kero'ojiko akuwaná nata'añáakeno neká yenuri e'iyowá. Ne'iyajena jata'akeño ulawí kaje chojé, namaka piyá neká. ³Israelítana ejátakeño nakaje ne'ekakapere e'iyowá. Richa ña'akana iphájika rená chojé kewá, madianítana, amalecítana, ajopana rewá i'imajíkaño wa'até, iphájika rejé, na'apákalaje nanaku reyá penaje. ⁴Re israelítana i'imaké napajré ja'apí, reyá i'imajemi ne'ejnaké namena apichátaje

naliyá. Ají ke kawakajo Gaza ejená napichátake namena; nenótake kaja naliyá napirana. Ñaké i'imakale, unká na i'imaké palá israelítanajlo, najñakaloje penaje. ⁵Kajrú madianítana iphájika rejo piyukeja napirana wa'até, rejé natára'atake napajré. Íki'iruna kaja nale'ejena caméllona i'imajika, neká apichátakeño piyuke namena. ⁶Ilé ke madianítana la'ajíkale neká, namake kajrú wani chapú kaje yajwé. Kaja ewaja napura'ó Tupana wa'até, ra'akáloje nañathé penaje.

⁷⁻⁸Nemá Tupánajlo, ri'imatákaloje neká madianítana liyá. Raú riwakára'a pajluwaja ripuráka'alo ja'apátajeri i'ijnaká nachaje. Riká kemari najló: “Ajopana chaje wakára'ajeri Tupana, ipechu i'imakare chojé kaphí. Riká kemari inaku: ⁹‘Nuká jácho'otari a'ajútayami Egipto te'eré eyá i'imaká. Re ne'emaké majopeja najw'até jápajeño ke. Unká Egipto eyájena liyaja kalé nu'umatá ne'emaká; nu'umatá kaja ne'emaká piyukeja chapú nanaku péchuruna liyá. Nócho'ota ne'emaká nate'eré nakiyá najló, nate'eremi yuríkaloje ijlo penaje. ¹⁰Numá kaja nunakuwá najló i'imaká: Iwakára'ajeri nuká, ipechu i'imakare chojé kaphí. Amorréona le'ejé, kele te'erí i'imakare nakú me'etení, re apú nachi'inárikana ke najló. Ikeroniño napiyá, ke numaká inaku, e'iyonaja unká jema'alá no'opiyá', ke Tupana kemaká inaku”, ke ripuráka'alo ja'apátajeri kemaká najló.

¹¹Re pajluwaja i'imari, rií i'imari Gedeón, Joás i'irí ri'imaká. Pajimila Ofrá e riñakaré i'imaké. Riká i'imari mana'ija rijápaka'ala la'akana nakú me'echú, madianítana amaka piyá riká. Trigo a'arú ka'akana nakú ri'imá. Kajmú kaje jalá apáka'aruna i'imaká e rila'á rijápaka'ala. E mana'í chiyó Tupana wa'atéjери, je'echú chiyaje, iphari Joás ñakaré awa'ajé. E riya'o pajluwana a'awaná ja'apí ipe'ení chu. ¹²E rajalaka Gedeón, rimá rijló:

—Re pijwa'até Tupana. Achiñá katejmuni, kaliyani wani piká.

¹³E Gedeón kemari rijló:

—Piyurí numaká nakaje nakú pijló. ¿Meke pimíchaka nojló: “Re Tupana pijwa'até”, ke? ¿Eta naje chi wamá me'etení kajrú wani chapú kaje yajwé? Chuwa unká Tupana la'alá wajló nakaje, rikaja kalé we'epíkare la'akana kaje, wachi'iná michuna kemájikare nakú wajló i'imajika ke. Ne'emaké kaja wajló mékeka rácho'otaka wa'ajútaya michuna Egipto te'eré eyá i'imaká yukuna. Tupana i'imakela wajwa'até, unká wamálajla chapú kaje yajwé, me'etení wamaka riyajwé ke. Kaja unká ra'alá rinakojó me'etení weká. Kaja riyuríkarena ta weká madianítanajlo, nala'akáloje weká chapú penaje.

14 Raú Tupana wa'atéjeri kemari rijló:

—Piká i'imatájeri israelítana, madianítana liyá, achiñá kaliyani wani pi'imakale. Tupana wakára'ari piká, pi'imatákaloje neká naliyá penaje.

15 E'iyonaja Gedeón kemari piño rijló:

—Piyurí numaká piño pijló nakaje nakú. ¿Meke la'ajé chi nu'umatajla israelítana naliyá? Mapeja i'imakaño weká, nojena wa'até; maliyáruna weká piyukeja najwa'até. Manasés michú lakénami weká; nawejáputena ke i'imakaño weká. Eyá nuká ta, mapéjari keja nojena ja'apejé.

16 E Tupana kemari rijló:

—Piká i'imatájeri neká, nu'umajíkale pijwa'até. Mapéjari keja pichá'atajika neká. Iná chá'ataka pajluwaja ina'uké, keja pichá'atajika piyukeja neká.

17 Raú Gedeón kemari rijló:

18 —Pila'á nojló nakaje. Piwata maare nuká, nulamá'atiyako pijló nakaje nuwátakare a'akana pijló me'etení.

—Je —ke rimaká rijló.

19 E Gedeón mujlúka'ari riñakaré chojé. Re rimotho'ó rijló kawayá pirakana i'imi; re'emá kaja rijló pan, unká rika'alá ramúra'atajona re'iyajé. Rejomi rito'otá ri'imi jirúla'ala kaje chojé, eyá rakho'ó ralá pero'ojló chojé. Rejomi ri'ijnatá riká Tupana wa'atéjeri ejo a'awaná ja'apejé. **20** E Tupana wa'atéjeri kemari rijló:

—Marí jipa nakojé piyá'ata ri'imi, pan wa'até, rejomi pakho'ó ralá richawa.

21 E riyá'ata riká. Rejomi Tupana wa'atéjeri jápari ri'imi, pan, kele nakú rikutiware wilaphe aú. Ilé ke rijápaka rinaku aú jipa,



ri'imi pitakaro nakú, pan wa'até, lukúna'aro. Wa'ató ke kera'athani apíro'otaka piyuke ri'imi, pan wa'até. Rejéchami Tupana wa'atéjeri kapichako reyá. ²² Ilé kaje aú Gedeón we'epiri Tupana wa'ateje ri'imaká, i'imari re rijwa'até. Raú rimá:

—Tupana, palá wani nomíchaka pijwa'ateje, je'echú chiyaje.

²³ E Tupana kemari rijló:

—Pikero'oniño, unká pitaka'alaje raú. Eko pipechu i'imá palá.

²⁴ Rejomi Gedeón pitari jipa altar penaje Tupánajlo, ripecchu i'imakale palá rinaku. Rejomi ra'á riká altar í: “Palá Tupana la'aká iná pechu”, ke. Re jo'ó kaja riká altar rila'akare i'imaká pajimila Ofrá e.

²⁵ Riwakajeja lapí Tupana kemari piño Gedeónjlo:

—Pijña'á para'apá pirana e'iyayá pajluwana jema pirakana achiñá. Rejomi pikajya'ataje altar, para'apá la'akare nachi'inárikana Baaljlo i'imaká. Eyá ilé a'awaná rawa'á tára'ako, nemakare nakú: “Wachi'inárikana we'epéjona riká”, ke, pi'ikajé kaja naliyá. ²⁶ Pila'ajé kaja apú altar jipa nakiyana rácho'oma kaje nakú nojló. Riká nakoje pinoje nojló jema pirakana, nuká Tupana, pipechu i'imakare chojé kaphijlo. Pinoje riká, rejomi pikára'atakaloje nojló riká. Ilé a'awaná, pi'ikajkare nachi'inárikana we'epéjonami nakiyana, pijña'ajé jiyá penaje, raú pikára'atakaloje riká nojló penaje —ke Tupana kemaká rijló.

²⁷ Raú Gedeón wá'ari rijwa'até jápajeño nakiyana iyamá th'éela ke, najwa'até rila'akáloje Tupana wakára'aka rila'aká ke. Rikero'okole rara'apá, eyá pajimila eyájena, keke piyá aú unká nala'alá Tupana kemaká rijló i'imaká ke we'echú. Lapí nala'á ñaké. ²⁸ Eyá muní ke lapiyami, pajimila eyájena amaka kajya'atákeja piyuke altar Baaljlo nala'akare i'imaká. Namá kaja a'awaná, nachi'inárikana we'epéjona penaje i'imakare, i'imaká i'ikakeja. E nayaka'o, amaño apú waje altar la'akanami tára'ako; namá kaja rinaku maapami ke nakára'ataka jema pirakana tami. ²⁹ Raú nemá pajlokaka: “¿Na ta ka'ajná keke li'ichari ilé ke?”

Rejéchami na'akó riyukuna kejá'aje piyuke rewá i'imakaño liyá. Kaja ewaja nawe'epí Gedeón kajya'ataka ri'imaká, raú ne'ejná rara'apá Joás ejo, iphaño rinaku, e nemá rijló:

³⁰ —Chuwa pácho'ota pi'irí ta majó, me'etení wenójika riká ta. ¡Riká ta kajya'atíyari altar wala'akare i'imaká Baaljlo; ñaké kaja ri'ikichaka ta a'awaná, wachi'inárikana we'epéjona penaje i'imakare!

³¹ E'iyonaja Joás kemari awakaño rinakojejo:

—¿Iká chi mejñátajeño Baal? ¿Iká kaja chi nókajeño richaya? Piyukeja mejñátajeño Baal, nókana i'imajeri, unká chiyó wajme'etá. Kewaka Baal i'imajika ee chi'inárikana, reja rimejñátare rikó; rila'are kaja chapú neká kajya'ataño rile'ejé altar i'imaká.

³²Reyá a'ajná ño'ojó, rewá i'imakaño kemakeño Gedeón nakú: “Jerubaal”, ke, rara'apá kemakale Baal nakú: “Reja rimejñátareja rikó, rila'are kaja chapú neká kajya'ataño rile'ejé altar i'imaká”, ke.

³³E kaja piyukeja madianítana, amalecítana, kamú jeño'oká ejo pitá ñakajélaruna wa'até, awakaño, nakuwá'akaloje juni Jordán majó pitá penaje. Nakuwá'aka riká ejomi, natára'ata piño yenuri jiwami e'iyowá napajré. Riká pukunaji, nayuríkaró ejé i'imaká, íf i'imari Jezreel. ³⁴E kaja Tupana pechu i'iwapataro wani Gedeón cha. Raú Gedeón apho'orí jema pirakana i'iwáwimi chojé, riwá'akaloje najló. Raú piyuke rejena, Abiezar lakénami, iphaño rinaku rejé. ³⁵Riwakára'a kaja ajopana i'ijnaká israelítanajlo wá'aje, nawakákalóje rejé najwa'até pajñakani penaje.

³⁶⁻³⁷E Gedeón kemari Tupánajlo: “Nuwe'epíkalóje kewaka piká wakára'aka nu'umataka piyukeja israelítana naliyá penaje, marí ke nula'ajika: Noto'otaje oveja ímami trigo a'arú ka'akelana ejé. Pu'uwaká lapiyami oveja chijnémija kalé me'etájika ijani, eyá te'erí rawa'ó i'imajíkare i'imajeri makajreni, raú nuwe'epeje kewaka pa'ajika nuñathé, nu'umatákalóje israelítana naliyá penaje, pimaká nojló i'imaká ke”.

³⁸Eyá lapiyami rijme'etá, amari oveja chijnemi i'imaká rimaká Tupánajlo i'imaká ke. E rapa'á oveja chijnemi e'iyayá juni, kuya chojé. Rimano'otá riká juni aú. ³⁹E'iyonaja Gedeón kemari piño Tupánajlo: “Piyúcha'aniño nuchá, numájikale pijló, pila'akáloje piño nojló ñakeja kaja penaje. Marí aú nuwe'epeje kaja penaje piká ka wátaka nu'umataka israelítana. Nuwata chuwa pejátaka te'erija kalé lapí, eyá oveja chijnemi i'imajeri makajreni. Te'erí rawa'ó i'imajíkareja kalé i'imajeri ijani”.

⁴⁰E kaja riwakajé lapí, ñaké Tupana la'aká rijló riká. Lapiyami ramá te'erija kalé i'imaká ijani, eyá oveja chijnemi i'imari makajreni.

7 ¹E kaja apú wakajé Gedeón (Jerubaal, ke najalákajika riká), rijwa'atájena, kele apoño lapiwá wani, ne'ejnakáloje Harod ejo penaje. (Juni muthú íf i'imari Harod, ke.) Re a'ajná ño'ojó ke ipuré Moré i'imaká, ri'ilawa kajrú madianítana pajré i'imaká.

²E Tupana kemari Gedeónjlo: ³“Kajrú wani pijwa'atájena maare pijwa'até. No'okela me'etení nañathé, nakapichátakaloje

madianítana penaje, e pijwa'atéjena pechu i'imakajla nanakuwá: 'Íki'iruna we'emichákale aú wakapicháchiya neká', ke. Raú unká nawe'epílajla nuká a'achaka nañathé nakapichátakana aú. Eko pimá piyukeja pijwa'atéjenajlo marí ke: Kero'ojeño nókakajo piyá, pa'ajeño nañakaré ejo”, ke Tupana kemaká rijló.

⁴E'iyonaja unká paala Tupana pechu nakú ri'imaká, íki'iruna wani jo'ó yuríkole Gedeón wa'até re jo'ó kaja. Raú rimá piño rijló: “Re jo'ó kaja íki'iruna wani pijwa'atéjena. Nakele piwa'a neká juni turenaje, ne'erakáloje rinakiyá penaje. Re notá'aje neká piyukeja, rejomi numaje pijló mékajenaka i'ijnajeño pijwa'até, eyá mékajenaka pa'ajeño nañakaré ejo”.

⁵Raú Gedeón witúka'ari rijwa'atéjena wa'até juni i'irajé. Nephaka rejé ee, Tupana kemari rijló: “Piwá'aje ajopana e'iyayá i'irajeño juni nakápiyo, yáwina pirakana i'iraká ke. Eyá i'irajeño juni najláma'ajiko ejomi, unká piwá'alaje pijwa'ató”.

⁶I'iraño juni nakápiyo, yáwina pirakana i'iraká ke, neká i'imaño trescientos. Eyá ajopana nanakiyana i'iraño juni najláma'ako ejomi. ⁷E Tupana kemari Gedeónjlo: “Mariruna achiñana, trescientos wa'ateja nu'umataje iká madianítana liyá. Najwa'até nukapichátaje neká. Eyá ajopana, piyukeja pa'ajeño nañakaré ejo”.

⁸Raú Gedeón wakára'ari ajopana pa'akó piyukeja nañakaré ejo. Napa'akó yámona, rimá najló, nayuríkaloje nale'ejé luwiluwí, i'ichilá, kaje rejé. E kaja napa'ó. Tupana i'iwapakárena trescientos ja kalé yuriño re. Re yenojo kemachi ne'emá napajré chu, eyá madianítana i'imaño na'apojó pitá kemachi napajré chu kaja.

⁹E kaja riwakajé lapí Tupana kemari Gedeónjlo: ¹⁰“Pácho'o, chuwaka piwitúka'aka pijwa'atéjena wa'até, madianítana wa'até



nókajo. Nuká a'ajeri piñathé, ichá'atakaloje neká nókakajo aú penaje. Pikero'ojiko ee najwa'até nókakano piyá, piwitúka'a paineko nachaje, pijwa'até jápajeri Purá wa'até. ¹¹Iphájika nanaku ee, pema'ajé mékeka nemaká, raú pipechu la'ajó kaphí, pi'ijnakáloje pijwa'atéjena wa'até najwa'até nókajo penaje”.

Raú Gedeón witúka'ari lapí napinana pajré i'imaká ejo, rijwa'até jápajeri Purá wa'até. Kaja ewaja nephá paineko i'imakaño pajré awa'ajé. ¹²Íki'iruna madianítana i'imaká, ñaké kaja íki'irunaka amalecítana i'imaká. Kajrú kaja nale'ejena caméllona i'imaká, kajrú natami lapa'akó rewá. ¹³Kaja nephá napajré awa'ajé, e nema'á pajluwaja suráa i'imaká apujlo ritapú yukuna, rimá rijló:

—Marí ke nutapúni'ichaka: nutapú nomicha pan kaje pilákichako majó we'emaká ejo. E ripháki'icho pajluwa wapajré wa'até, raú rikajya'atiya riká pajreji.

¹⁴Raú rijwáke'ewe kemari rijló:

—Marí ke kemakánaka riká: Joás i'irí Gedeón, rijwa'atéjena, kele kapichátajeño weká. Tupana a'ajeri riñathé, richá'atakaloje piyukeja weká penaje.

¹⁵Gedeón jema'arí mékeka ri'imaká rijló ritapú yukuna, rejomi rema'á kaja mékeka rijwáke'ewe kemaká rijló rinaku, raú pu'ují wani ripechu i'imaká Tupana nakú. Rejomi ripa'ó rijwa'atéjena i'imaká ejo, rimá najló:

—¡Chuwá jácho'o, Tupana a'ajeri wañathé, wachá'atakaloje madianítana penaje!

¹⁶Riká penájeja nácho'oko reyá. Nácho'oko reyá piyá, ritamáka'ata rijwa'atéjena weji kele puku, apa'amana, apa'amana ke. Rejomi ra'á najló luwiluwí kaje nanakojó. Ra'á kaja najló nanakojó jepé lukúna'akeja, i'ichilá ja'apí i'imakare. ¹⁷E rimá najló:

—Chuwa i'ijná, we'ejnachi. Nuká, nujwa'atéjena wa'até, iphájeño pa'anojo pitá ke, chapú wanaku péchuruna pajré to'okó ejé, eyá iká yaká'ajeño wachaje. Amájika wala'aká ke kaja ila'ajika. ¹⁸Wapho'ojika ee waluwiluwine chojé, ñaké kaja apho'ojika iluwiluwine chojé wajwa'até, pajñakani ke, piyukeja napajré to'okó ewá. Rejomi awíyo'oje marí ke: “Tupánajlo, Gedeónjlo wa'até”, keja awíyo'ojika —ke rimaká najló.

¹⁹E kaja nawitúka'a rejo. E Gedeón, rijwa'atéjena wa'até, iphaño napajré to'okó ejé, pa'anojo pitá nakojó. Cien rijwa'atéjena i'imaká rijwa'até. Nephá rejo lapí jenaje ke, wajé wani madianítana wa'aphena apiyákako ee. Rejéchami napho'oká

naluwiluwine chojé, wa'ató ke namajáka'ataka i'ichilá nakapi i'imakare. ²⁰Pajñakani ke ajopana, ajopana ke, la'aká ñakeja kaja. Eyá nayáthe'ela pajrú aú napatá jepé kaje, ka'añá nayáthe'ela aú napatá naluwiluwine, e nawíyo'o: "Tupánajlo, Gedeónjlo wa'até", ke nawíyo'oka. ²¹Rejomi mana'ija natára'ako ne'emaká ewá. Eja madianítana jácho'oño napajré ja'apiyá, neñaakóloje penaje, kajrú nawíyo'oka. ²²Wa'ató ke Gedeón, rijwa'atéjena wa'até, apho'oká naluwiluwine chojé. E Tupana la'arí madianítana, nenókakoloje pajwa'atéchaka penaje, e kaja ajopana ñaaño reyá. Ne'ejná ají ke pajimila Bet-sitá, Sererá, kele loko'opáneje, tajnaño Abel-meholá te'eré nakoje, Tabat te'eré awa'á riká.

²³Wa'até ke Gedeón wakára'aka rijwa'atéjena nakiyana i'ijnaká ajopana israelítana amaje, ají ke Aser te'eré ejo. Neftalí michú, Manasés michú lakénami, kele ne'emaká. Nephaka nanaku rejoy ee, nemá najló, necho'ótakaloje madianítana penaje. ²⁴Ñakeja kaja riwakára'aka piño ajopana i'ijnaká ajopánajlo kemaje Efraín te'eré ejo, yenuri e'iyá i'imakáñojlo. Nawakára'a piyukeja achiñana rewá i'imakáño witúka'aka, nenókakoloje madianítana wa'até penaje. Najló nemá, ne'ejnakáloje juni Bet-bará e i'imaká turenaje, eyá Jordán turenaje, nephákaloje rejoy, madianítana kuwá'aka piyá pa'anojoy pitá. Nematiká najló i'imaká ke Efraín eyájena la'aká. ²⁵E kaja ajopana i'ijnáño najwa'até nókajo. Neká chá'ataño neká, eyá napatá madianítana wakára'ajeño iyamá. Pajluwa íí i'imari Oreb, apú íí i'imari Zeeb. Oreb michú nenó kajruni jipa i'imaká e. Nenoka ri'imaká ejomi, na'á riká jipa íí Oreb, ke. Zeeb michú nenó kajmú kaje apáka'aruna e. Zeeb, ke kaja kajmú apáka'aruna íí i'imaká, nenoka ri'imaká ejomi. E ne'ejnatá nawakára'ajeño michuna wíla'arumi Gedeón ejoy, Jordán pa'anojoy pitá.

8 ²⁸Ilé ke israelítana chá'ataka madianítana i'imaká. Rejomi unká nakawíla'ake nanaku. Gedeón i'imari iyamá ina'ukena le'ejé kele jarechí ketana re jo'ó kaja eja'awá chu rejomi. Ketana mana'ija israelítana i'imaká rewá. Riwakajé unká nókakajo i'imalá rewá.